



REPUBLIKAY'URWANDA
INTEKO NYARWANDA Y'URURIMI N'UMUCO
(RALC)

B.P. 5796 KIGALI - RWANDA
E-mail: info@ralc.gov.rw
Website: www.ralc.gov.rw



Ibisobanuro ku ngingo Dr. Eugène NSHIMAMUNGU yagizeho impungenge mu Mabwiriza ya Minisitiri yerekeye imyandikire y'Ikinyarwanda yasohotse mu Igazeti ya Leta No 41 bis yo ku wa 13/10/2014

Turagushimira muvandimwe Eugène SHIMAMUNGU kubera ko wagaragaje rwose ishyamba n'ubushake ufite byo kubona Ikinyarwanda cyandikwa neza. Turagushimira kandi kuba warashimye Inteko Nyarwanda y'Ururimi n'Umuco ugaragaza ko hari ibyo yakoze mu mabwiriza nawe wari utegereje. Impungenge wagize ku ngingo zimwe na zimwe na zo zirumvikana kuko zishobora kugirwa na buri wese cyane iyo asanga imyandikire ikwirirye gushingira ku isesengura ry'amagambo no ku nkomoko yayo. Ibi ariko byatera impungenge na none kubera ko abantu bose bandika si ko bose bahugukiwe n'uburyo bwo gusesengura. Ikindi ni uko n'uwaba abihugukiwe akajya abanza gusesengura ijambo akabona kumenya uko arandika byaba ari akazi kagoranye. Byaba rero birushijeho gukomerera abatarize iyigandimi ry'Ikinyarwanda.

Dukurikije impungenge wagaragaje, twaguhaha ibisobanuro bikurikira:

1. Kuvanaho ibihokane « nc », « ncw » (ingingo ya 10, 13)

Ibi bihekane ntabwo bishingiye ku iyigamvugo ahubwo bishingiye ku iyigantego. Ni ukuvuga ko uvuga amenya niba ari bukoresha **nc** cyangwa **nsh** ari uko abanje gusesengura ijambo (**i-n-cuti**), akamenya ko igicumbi cy'ijambo (**-cuti**) gitangirwa na **c**, na ho mu ijambo **inshishi (i-n-shishi)** kigatangirwa na **sh**.

Nyamara uvuze **incuti** undi akavuga **inshuti** ntibihindura igisobanuro cy'iryo jambo. Iyi migirire inyuranye n'ihame ry'igeruramajwi ndetse n'ihame ry'iyoroshyamategako mu myandikire, kuko uwandika bimusaba kubanza gukora isesengurajambo kugira ngo amenye niba ari bwandike neza, kandi ubwo bumenyi atari buri wese ubufite.

Kuba ibi bihekane “nc” na “ncw” bitaboneka muri ruriya rutonde byatewe n’uko mu iyigandimi, iyo inturike nkubyi zibanjirijwe n’inyamazuru, inturike t, p, ziratakara. Mu rwego rwo koroshya imyandikire, hakoreshwa ibimenyetso **nsh** mu mwanya wa **nc**; **nshw** mu mwanya wa **ncw**; **nshy** mu mwanya wa **ncy**; **ns** mu mwanya wa **nts**; na **mf** mu mwanya wa **mpf**.

Aha rero twakumara impungenge ko kuba igihekane **nts** kizajya cyandikwa gusa n’igihekane **ns** bidahindura inshinga “gutsinda” ngo ihinduke “gusinda” nk’uko wabigaragaje. Binabaye “gusinda ibitego” mu gihe bibaye byinshi bigatera ibyishimo byinshi, bizasobanuka hakurikijwe uburyo interuro iteye. Bityo n’ikivugwa gihite cyumvikana.

2. Ikibazo gituruka ku kvanaho igihekane “cy” imbere ya “e” na “i” (Ingingo ya 12).

Amabwiriza y’imyandikire agamije kunoza no guhuza imyandiko. Ibyo bikaba bituma habaho imyandikire imwe, kuko gutandukanya **ki** na **cyi** bishingiye ku iyigantego. Kwandika ushingiyeye ku iyigantego bigora abandika batari abahanga mu isesengura ry’amagambo.

Kubera ko **k** imbere y’inyajwi **e** na **i** ikora kimwe na **cy** icyaba kiza ni ugukoresha ibimenyetso bikeya no guhuza uburyo bw’imyandikire. Kuba twanditse mu bumwe *Ikibabi k’igiti* ntibibuza ko mu bwinshi twandika *Ibibabi by’ibiti*.

Ibi dusobanuye aha ni na byo bireba imyandikire ya “jy” imbere ya “e” na “i” kuko gutandukanya **gi** na **jyi** na byo bishingiye ku iyigantego.

3. Imyandikire ya gihanga

Wanenze ko muri aya mabwiriza bakomeza kubwira abandika gukoresha akamenyetso k’agatemberi mu kwandika isaku nyejuru aho gukoresha ikimenyetso cy’agasharu (’). Aka kamenyetso uvuga abateguye aya mabwiriza barakazi. Ariko ibitekerezo by’impuguke n’amabwiriza yariho mbere y’iri byemeje aka kamenyetso k’agatemberi, kandi kugeza ubu na ko kaboneka ku nyajwi zose z’Ikinyarwanda ziboneka muri mudasobwa.

4. Inshinga mburabuzi **ni**.

Ibyo wavuze kuri iyi nshinga ahubwo bivanga ibintu bibiri bidafitanye isano. **Ni** igaragara mu **gutegeka** no mu **kuziganya** ntabwo ari imwe na **ni** y'inshinga nk'uko ubikeka. Izi **ni** zombi zifite inshoza zitandukanye. Ku ntegeko no ku nziganyo **ni** ni akano nk'uko nawe usanzwe ubizi, ntaho gahuriye n'iriya nshinga mburabuzi **ni**. Iyo **ni** y'integeko n'inziganyo iyo witegereje neza usanga ari akaremajambo k'indango k'inshinga biri kumwe, mu gihe **ni** y'inshinga mburabuzi yo ubwayo ifite inshoza muri yo.

5. Ibinyazina ndangahantu **ho, yo, mo (mwo)** n'akaremajambo **ko** byandikwa bifatanye n'inshinga nk'uko byari bisanzwe kuko ubushakashatsi bwagaragaje ko nta kibazo bitera. Akajambo **ko** gahuza inyangino ko gatandukana n'izo nyangingo .

6. Impakanyi **nta**

Kwandika iyi mpakanyi ifatanye n'inshinga iyikurikiye ntibikwiye kugutera impungenge kuko ubushakashatsi bwagaragaje ko abantu bandikaga mu buryo butandukanye iyi mpakanyi iyo ikurikiwe n'inshinga itondaguye. Mu buryo bwo koroshya imyandikire, ni byiza ko yandikwa ifatanye n'inshinga iyikurikiye kimwe n'utundi turemajambo duhakana nka **nti-** cyangwa **si-**. Ingero: Ntabareshya, ntabaje.

Yakurikirwa n'ubundi bwoko bw'ijambo ikandikwa itandukanye na ryo kuko iryo jambo riba rifite imiterere izwi ndetse rimwe na rimwe hagati y'iryo jambo na **nta** hari ubwo ushobora gushyiramo irindi. Ingero: nta gikuba cyacitse, nta **wundi** mwana uhari, nta cyo tubuze, nta zo nshaka.

Ibihekane "**mf**" na "**mv**" ni ibintu bimenyerewe mu myandikire y'ikinyarwanda. Inyamenyo "**n**" ihinduka inyaminwa "**m**" iyo ikurikiwe n'indi nyaminwa. Bityo "**nf**" ihinduka mf naho "**nv**" igahinduka mv.

Ku mpungenge wagize ku ngingo ya 44 n'ya 45 uvuga ko zivuguruzanya, aya mabwiriza ahubwo araguhumuriza. Avuga ko n'uwagira ingorane zo guhita amenyera kuyakoresha byibura nyuma y'imyaka ibiri azaba amaze kuyamenyera.

Inteko Nyarwanda y'Ururimi n'Umuco